

# Herman Hennep ta presenta buki "Buscando Felicidad" awe na Van Dorp

"Por fin el a yega. Scolnan por ta contento awo", tabata palabranan di Sr. Herman "Manchi" Hennep ora cu mi a topa cune na su cas tocante e buki "Buscando Felicidad".

Diezun aña pasa, aña 2002 el a publica e buki aki, y den corto tempo e buki a sold out. hopi scol a keda pidi pa e buki, otronan tabata busca mas buki pa scol, pero e no por a haci

nada, pasobra e no a spera cu e bukinan lo a caba asina lihe.

"Mi a keda cu e pensamiento keto bay di re-imprimi e buki, pasobra continuamene mi tabata hayami cu hobennan cu ta pidi pa e buki y scolnan cu kier esaki. Danki na UNOCA, mi a logra atrobe pa por imprimi e buki di nobo".

El a haci cambionan den e ortografia, revisa e buki y a logra

reimprimi esaki, te cu porfin e buki a yega y awe ta wordo presenta atrobe na Van Dorp hunto cu bukinan di diferente autor cu lo ta presente tambe na Van Dorp cu nan publicacion.

"Loke a pone tambe cu a tarda pa mi a traha riba e edicion aki ta cu mi tabata ocupa cu e di dos buki, "Tres diferente Ruta" cu tambe a logra exito



grandi na Aruba, y despues di 3 aña mi a bin cla tambe pa publica e buki "Ursula" cu tambe a resulta masha gusta den comunidad aña pasa. E ora ey mi a haya mas tempo pa termina cu e revision pa re-imprimi "Buscando Felicidad" y hala rosea por fin awor cu e ta riba mercado atrobe", Manchi a duna di conoce.

El a indica cu e ta spera cu e scolnan lo tuma contacto cu su persona of cu Van Dorp relaciona cu e buki aki, pa nan ta sigur cu nan tin e den nan biblioteca di scol. "Mi ta spera di mira basta hoben y mayornan cu lo kier cumpra e buki den Ban Topa".

E ta masha agradecido cu Van Dorp a inclui su persona hunto cu otro autornan manera Gino Vrolijk, Miguel Donata, Jacques Thonissen, Noris Donata, Carmen Kock Herrera

entre otro den e tradicional Ban Topa di e libreria.

"E mainta y merdia aki ta masha agradable na Van Dorp, pasobra e publico, ademas di por cumpra buki y ricibi firma di e autornan, por mira otro arte cu lo tin, goza di musica tipico di caha di orgel, saborea platonan crioyo y pasabocanan tradicional di nos isla y pasa momentonan masha agradable" el a laga sa.

Riba e pregunta kico e tin pa e lunanan venidero, Sr. Manchi Hennep a forma un sonrisa y despues di un rato den un manera chistoso a contesta: "Mi tin un larva den mi cerebro actualmente. Mi ta sperando pa su capa bira seda y pa despues e larva aki sali di mi mente manera un barbutete bunita y deleita tur hende cu su storia. Titulo y tema lo tende despues."